

Durante temporada di horcan

Siguridad alimenticio mester keda un prioridad



ORANJESTAD - Temporada di horcan a cuminsa y un punto cu ta surgi tin di haci cu e siguridad alimenticio; y si nos pais ta bon prepara pa atende cu

cualquier calamidad natural y sigui abastece nos comunidad cu cuminda.

Durante e conferencia di Acuril 2019 cu ta tumando

luga actualmente na Aruba ayera, e orador Sharmin Renwick di Grenada a referi riba e topico di siguridad di alimento. Un reflexion cu a bin dilanti tabata di presidente

di Acuril, Monique Albert, kende a referi na e problema cu a surgi di siguridad alimenticio despues cu horcan Irma a asota St. Maarten na luna di september 2017.

E situacion aki a trece un caos unda acto di kiebrot y ladronia a sosode, ya cu e hendenan motiva pa elemento psicologico tabatin temor cu nan lo keda sin cuminda. Esaki a trece cune cu e negoshinan di benta di cuminda a cera nan porta. Tambe tabatin container cu alimento cu a bin for di Hulanda, pero e gobierno no tabatin e infraestructura adecua pa distribui e alimentonan aki.

Despues di e suceso aki nan a traha un analisis di e experiencia cu nan a pasa aden y esunnan cu mester a tuma decisionnan. Un analisis tabatin di haci cu e definicion di e obhetivo di e siguridad alimenticio ya sea socio-cultural, fisico, etc... Despues di a evalua e nivel di siguridad alimentario. Nan por a ripara cu despues di un calamidad, manera e consecuencianan

cu un horcan ta laga atras, e clase politico ta bay riba motivacion diferente, caminda e planificacion dilanti un desaster natural no ta un prioridad riba nan lista.

Monique Albert a bisa cu den un caso asina, e mesun comunidad, e ciudadanonan mes, ta esunnan cu mester insisti kico nan kier mira riba e agendanan di e politiconan. Tambe riba planificacion di reparticion, cantidad y durabilidad di e alimentonan disponibel pa asina garantisar e tema di e siguridad alimenticio di manera serio.

Albert ta directora di Sint Maarten's Philipsburg Jubilee Library. E ta representa e Asociacion di Bibliotecanan di e Caribe Hulandes. Albert a yega di traha diferente publicacion, y e ultimo aki relaciona cu e analisis haci despues di e horcan Irma na St. Maarten y siguridad alimenticio, a keda publica recientemente. E ta dispuesto di comparti digitalmente e documentonan aki.